

TEZAUUR LITURGIC

19 MAI

SLUJBA

SF.CNEAZ

DIMITRIE DONSKOI

*

SF.CNEAGHINE

EVDOCHIA

DE LA MOSCOVA



MOSCOVA, 2000



Служба святым благоверным князю Димитрию Донскому и княгине Евдокии Московской

На великой вечерни

На Господи, возвах: стихиры, глас 6:

Приидите, людие, / христолюбцы дивныя
восхвалим, / Димитрия князя и княгиню
Евдокию, / народ во бранех и скорбех
укрепившия / и любовь многу ко ближним
имевшия. / Молитесь, благовернии, ко Господу,
/ да введет род христианский во Царствие Свое.
Любве и верности дар стяжавшии / и людем
мнозем сей предавшии, / благовернии Евдокие
и Димитрие, / хвалит вас Церковь Божия, / яко
брака христианского зиждители / и о супругах
православных пред Богом ходатаи; / чад многих
родители и воспитатели, / ныне же многочадия
семейством испросити могущии. / Господа
молите, // да укрепит в житии христианством
души наша.

Многими напастыми обдержими / от враг
видимых и невидимых, / к вам с надеждою
прибегаем, / Димитрие и Евдокие благовернии,
/ яко победителем во бранех ратных и

словесных и умных, / да вашими молитвами // победительны сотворит Господь души наша.

Слава, глас тойже:

Руси православныя заступницы, / мужей святых собеседницы, / Церкви Божия рачители, / Димитрие княже со Евдокиею княгинею, / Господу послужите изрядно, / Иже многими подвиги прослави вы есть; / к Тому вопием умильно: / даруй нам в вере и в житии святым Твоим уподобиться.

Тропарь, глас 4:

Веры Христовы ревнители, / Руси православныя соиздатели, / отечества свободы поборники, / храмов и обителей устроители, / брака честна хранители / и чад многих о Христе воспитатели / яви вас Господь народу Своему, / благовернии Димитрие и Евдокие; / память вашу ныне празднующе, / Бога молим усердно, / да предстательствы вашими укрепляеми, / по образу вашему житие проживем, // к Царствию Божию управляя души наша.

На утрени

Величание

Величаем вас, / благовернии Димитрие и Евдокие, / Руси Святыя создатели / и семейства христианскаго / вернии устроители.

Канон, глас 2

Песнь 1

Ирмос: Воду прошед...

Припев: Святии благовернии Димитрие и Евдокие, молитесь Бога о нас.

По Бозе хождения взыскующе человеком же и народом, славит Христова Церковь князя Димитрия и Евдокию княгиню, ихже предстательством да укрепит Господь Русь Святую, земная в ней небесным совокупляя.

От Господа народом путие устраются, от Негоже и исправляеми бывають. Молитесь, Димитрие со Евдокиею, да прави присно пребудут народов пути христианских, во еже от порока смертнаго им уклонятися и по Христу грясти выну.

Образ пребыли есте жития христианскаго, княже доблий и княгине премудрая; ныне же нас и нам соплеменных, наипаче же и всех людей Божиих, во благочестии наставляете, к житию чистому преводя, еже по заповедем Христовым.

Несть мира в костех наших, благовернии, и распри мнози посреде нас воздвигаются; возропта бо мир сей, прелюбодейный и грешный, на Господа и на Церковь Его, и враг рода человеческого омертвити веру Христову дерзостно тщится. Но возопите к Богу, святии сродницы наша, да стоим твердо во истине Его. Богородичен: Мати Чистая, мир, Тебе всыновленный со Иоанном любве апостолом, сохрани и просвети, и омой слезами Твоими, и покрый Твоею любовью, Сына Твоего и Бога присно умоляющи.

Песнь 3

Ирмос: Небеснаго круга...

Сын славный и дщерь красная Руси православныя, от юности просвещения Христова сподобилися есте, Димитрие со Евдокиею; ныне же светом Господа своего сияете во Царствии Его, да и мы сего причастники пребудем, молитвою вашею непрестанною.

В годину обстояний многих и иноплеменных нашествий изрядных, веры православныя, и надежды, и любве никакоже оставили есте, от юности ваша донележе ко Господу преставилися есте. Испросите же и нам у Христа милости, да житие все о Нем устроить

сподобимся.

Родителей благочестивых отрасли, мужей верою и властью крепких, жен же чадородием и любовью спасаемых, наставлениям их в житии своем последовали есте; мира испросите и друг другу поспешения чадом и родителем православным.

Церкви Святыя сызмальства быша чада христолюбивыя, Евдокие и Димитрие; от неяже научахуся, еюже и укрепляхуся, в нейже и благодать Божию стяжаху. Крепко ко Господу возопите ныне, да пребудет Русь присно Святою, Церкви Христовы верное утверждение. Богородичен: Дево Владычице, от юности наша до старости сохрани ны от волн моря житейска непоглотимы. Аще в юности согрешихом, к покаянию приведи, аще в старости верою оскудехом, юность духовную обнови; наипаче же ко Христу приведи, Егоже у престола вышняго зриши.

Песнь 4

Ирмос: Услышах, Господи...

Суздаль и Москва сретостася, егда совершися брак ваш, Димитрие и Евдокие; любы же радость в мир претвористеся, племена и княжества совокупляя. Бысть же сие от Господа, да ведут людие в веках многих, яко семейство

христианское все житие народное ко благу устрояет.

Град славный Коломна прият вас ко освящению брака молитвою церковною, ведеша бо вы и родители ваша, яко дом супружеский молитвою стоит и Божиим благоволением; зряще сие, и мы ко Господу вопием, да созиждутся соузы брачныя яко храмины Бога Вышняго.

Радовашесе о браце вашем, Евдокие и Димитрие, святитель богомудрый Алексий. Киев бо древний и новая Москва, православием соединенныя, житие свое обновляху, ибо мужа святого и святую жену княжити на Руси поставляше Господь, отечество наше воссоздавая и крепости велия тое сподобляя.

Брак во Христе Руси Святыя есть утверждение, мира ея и крепости основание;

исходатайствуйте нам, Димитрие со Евдокиею, помощь скорую Христа, Пастыря добраго, во устройении супружеств православных.

Богородичен: Супругов и чад их Заступнице и Наставнице, Мати Христа Бога нашего, водительствуй выну чады верными Господа и Сына Твоего, да житие свое на земли Царству Его уподобят.

Песнь 5

Ирмос: Просвети нас...

Милостей многих, Димитрие и Евдокие, сподоби вас Господь, но безпечия житейскаго не попусти вам. Скорби велия в земли Русской быша, и чрез оныя слава Божия ся явила есть, понеже святии силою Его возмогли суть, вере и любви люди вся научая.

Огнем опалена бысть Москва, внегда начинати тебе, Димитрие, служение княжеское. Трудями многими град свой и Кремль священный возставил еси; и ты, Евдокие, споспешница бе в сем. Града святаго строители и семейства благочестиваго соиздатели, силу нам у Бога испросите подвигом добрым подвизатися во славу Его.

Егда язва моровая люди многия бяше потребила, благодетельница народу твоему явилася еси, Евдокие княгине. Болящих и скорбных утешающи, милостыню щедро подающи, усопших погребения сподобляющи, любовь сородичей твоих снискала еси, яже материю ты именовашу. Ты же, Димитрие княже, в трудах сих праведную укрепил еси.

Распри междуусобныя раздирашу Русь, но ты, княже благоверный, мир, единомыслие и купножителство во отечестве нашем утвердил еси словом и властью, от Бога ти данною. Мир и

в семействе твоём утвердился есть крепко,
понеже пребыл еси ты с княгинею Евдокиею аки
душа едина во двух телесех и житие едино,
якоже летописец древле рече.

Богородичен: Молися, Ходатаице наша, о роде
христианством, да пребудем купно друг со другом
и со Христом в горести и радости, и искушении,
и наказании, и да укрепит нас в вере
соединенных Господь.

Песнь 6

Ирмос: Молитву пролию...

Страдаше Русь от ига иноземнаго, внегда
княжити вам в Москве, святии Божии; и ты,
Димитрие, государю христолюбивый, словом
мудрым и подвигом ратным отечество
сохранити и укрепити потщался еси. Ты же,
княгине благоверная, моляше денно и нощно
Бога, да сохранит род православный.

Велие обстояние прииде на Русь от Мамаю хана,
и собращася рать православная, да народ
русский цел и свободен сохранит; прииде же
жены к воином с плачем сердца своего, и рече,
Димитрие, ко Евдокии княгине: жено, аще Бог с
нами, кто супротив нас?

Победу на супостаты дарова Господь народу
Своему, благословением аввы Сергия, по
молитвам твоим неусыпаемым, княгине, с

народом всем, и подвига ради ратного твоего, княже, с дружиною твоею и со иноки святыми Пересветом и Ослябею. Молитесь, святии, да над всяким врагом, видимым же и невидимым, победу имут людие православнии.

Собирающу ти, княже, дружину русскую, новое воинство вражие приведе на Русь Тохтамыш хан, истреби огнем град Москву и тысящи людей смерти предаде. Ты же, Едвокие княгине, во обители Горицкой чад своих соблюдаящи, избавления чудеснаго на озере Плещеевом сподобилася еси. Верую и мудростию вашею возстави Господь Русь православную.

Богородичен: Сохрани, Мати Божия, вся роды христиан православных от тли и смерти, от работы врагом Христовым и грехом же, из сердца человека исходящим; да побеждаем присно во бранех духовных и ратных, словесных же и умных, верую пред Богом ходяще.

Кондак, глас 8:

Русь Святая ликовствует днесь, / верую
Христовою утверждаемая / и святыми своими
красная, / о Димитрии и Евдокии благоверных.
/ Житию их уподобиться потщимся, / братие и
сестры православныя, / да по Бозе путие наши
устраются / в мире, любви и крепости, // во
спасение людей христолюбивых из рода в род.

Икос

Посреде скорбей многих и напастей молитвою и труды прославили есте Бога, Димитрие княже и Евдокие княгине, Русь Святую возставивше, люди многия в вере укрепивше и Царствия небеснаго достигше; темже ныне со дерзновением по Бозе вас прославляем: радуйтесь, рода православнаго столпи крепцыи, радуйтесь, супружества христианскаго сосуды дивнии, радуйтесь, ходатаи о нас пред Богом неусыпаемии.

Песнь 7

Ирмос: От Иудеи дошедше отроцы...

Царский сан держаше и ангельски живяше, тако рече о тебе, Димитрие, летописец древле; ты же, Евдокие, в посте и молитве супругу твоему соревноваше, да мы ныне вас величаем, яко бысте о Бозе трудники и благочестия подвижники, житием вашим Христа прославльше, Иже благословен еси.

Многих святых словом и образом поучахуся, княже и княгине благовернии; Сергей, авва земли Русския, Алексий, первосвятитель ея, Феодор, игумен Симоновский, и прочия мужи богомудрыя назидаху вас и в вере укрепляху, храмину же брака вашего по Бозе созидаху, Онже благословен еси.

Храмы и обители мнози возстави Бог труды вашими, Димитрие со Евдокиею, потщаху бо ся благоустроить духовно грады русския, наипаче же души и сердца человеческия. Мы же, доньне во храминах сих земных и обителех Царя Небеснаго славяще, вопием Ему: отец наших Боже, благословен еси.

Огнем Духа Божественнаго распаляхуся и слезми покаянными очищахуся, Евдокие и Димитрие, якоже рече летописатель. Испросите нам веры огонь светлый и покаяния навык крепкий у Христа, яко Бога отец наших.

Богородичен: Богородице, едино наше по Господе упование, исходатайствуй у Него нам отчаянным веру истинную присно хранить, наипаче же по ней пожити, дела и словеса Христа проповедуя.

Песнь 8

Ирмос: Царя Небеснаго...

Верую стояху брак ваш и семейство ваше, Димитрие княже и Евдокие княгине. Молитвою бо и таинства церковными укрепляхуся и чада ваша наставляху в богомыслии и исполнении заповедей Христовых; нам же образ являете ныне домостроительства брачнаго и родительскаго по Бозе, во святых Своих благословенном во веки.

Брак честен и ложе нескверно даровал вам есть Господь; чада многия рождающе, в молитве, посте и целомудрии иноком уподобляхуся. В век сей, благочестие дерзостно презрети хотящий, будьте нам наставники и ходатаи, да чистоту блюдут во браке людие православнии, Жизнодавца Христа славяще во вся веки.

Дванадесять чад в вере воспитали суть, Евдокие со Димитрием; множайшия тех славу велию отечеству суть принесли. Испросите супругом православным волю крепку во еже чада многая рождати и в вере истинней наставляти, да славят Христа Бога роди и роди, Егоже отроцы благословите, священницы воспойте, людие превозносите во вся веки.

Зраки суть любви христоподражательныя, еюже обьяху друг друга и чад ваших во вся дни жизни своея, благовернии. Возопите ко Отцу всех, да николиже любви престаает в нас и во всех народех христианских, любви Христовы к нам ради, в безконечныя веки.

Богородичен: Укрепи, Дево и Мати, супружества христианския, да купно мужие и жены в Царство Сына Твоего восходят, чад своих к спасению приводяще чрез Церковь Бога Твоего и Бога нашего, егоже держава пребывает во веки.

Песнь 9.

Ирмос: Воистину Богородицу...

Егда прииде время преставитися ти ко Господу, Димитрие, рече к Евдокии княгини: буди чадом своим отец и матери, наказующи их и укрепляюще по заповедем Господним. И сыновом рече: Бога бойтесе, поминайте писание, чтите родителя своя, да благо вам будет, мир и любовь имейте меж собою. Молисе ныне, да совершатся словеса сия на нас, яко чадах чад твоих.

Евдокие святая, исполнивши завет княжий о чадах твоих, пред кончиной образ ангельский восприяла еси, егоже стяжати лета многая быше тщиася; ныне же в чине преподобных матерей за нас молиши Бога, да дарует супругам православным многочадие вкупе с о Христе целомудрием.

Песнь духовную не престанем воспевати Димитрию и Евдокии, князю и княгине пречудным, яже милость Божию и мир на отечество наше призывают выну, супругов и чад их о Бозе благоденствия сподобляюще.

Утверждайся в вере, Русь Святая, гряди по Господе Своем, на пути лукавья никакоже уклоняйся, но обновляйся духом, молитвами Димитрия князя достославного и Евдокии княгини премудрыя.

Богородичен: Сподоби нас, Пречистая, чистоту жития и в подвизах преуспеяние стяжати, да Димитрию и Евдокии благоверным подобни пребудем, молитвами Твоими.

На хвалитех стихиры, глас 2:

Димитрия и Евдокию песньми почтим, / яко правителя богомудраго / и супругу его благочестием славную, / яже образы нам супружества вернаго показали суть / и о людех попечения непрестаннаго. // Память ныне тех празднующе, хвалим Господа сил.

Господи, люди Твоя в вере правей утверди / молитвами святых Твоих, / Димитрия и Евдокии благоверных, / яже чин княжеский благочестию сочетаху / и любви дар во Христе стяжаху, // да и мы, им последующе, в живот вечный грядем.

Мужа и жену сотвори Господь, / два состава едина рода человека, / к соединению призвав обоя, / еже во Христе союза вернаго; / по заповеди Божией во браке честне соединилися есте, / Евдокие и Димитрие, / ныне молитесь супругом христолюбивым от Господа подати // любви и радости, единомыслия и мира.

Слава, глас тойже:

Роды православныя умножи, Господи, / яко умножил еси семейство благоверных чад Твоих,

/ родителей же чад многих, / Димитрия князя и
княгини Евдокии, / яже во благочестии сыны и
дщери наставляху / и образ жития
христианскаго им бываху. / Тех молитвами
сподоби народы христианския процвести // да
хвалят Тя дела и словеса.

[Выкладываю проект общей службы свв.
Димитрию и Евдокии на этот день,
составленный митрофорным **протоиереем**
Всеволодом Чаплиным, клириком города
Москвы]

